

ओं नमः परमात्मने, श्री महागणपतये नमः,
श्री गुरुभ्यो नमः, ह॒रिः ओं

कृष्ण यजुर्वेदीय तैत्तिरीय संहिता पद पाठः
(वाक्य सहित)

चतुर्थकाण्डे सप्तमः प्रश्नः

Notes:

1. Please refer to the book “TS Kandam 1” and “TS 1.1 pada paadam with Vaakyam” for notes and conventions used in this Compilation.
2. Please download our vedic compilations from our web site www.vedavms.in

Version Notes:

This is now the current Version 2.0 dated June 30, 2024.

1. This replaces the earlier version 1.1 dated June 30, 2022.
2. This version has been updated with the errors found and reported till June15, 2024.
3. Required convention, style and presentation improvements or standardisations has been done wherever applicable.
4. Notify your corrections / suggestions etc to our email id "vedavms@gmail.com"

Earlier Versions

1st	Version Number	0.0 dated 31st August 2018
2nd	Version Number	0.0 dated 31st January 2019
3rd	Version Number	0.0 dated 31st August 2019
4th	Version Number	1.0 dated 31st January 2021
5th	Version Number	1.1 dated 30th June 2022

Table of Contents

4 कृष्ण यजुर्वेदीय तैत्तिरीय संहितायां पद पाठे चतुर्थ
काण्डं 4

4.7 चतुर्थकाण्डे सप्तमः प्रश्नः – वसोर्धारादिशिष्ट

संस्काराभिधानं..... 4

पद पाठे (वाक्य सहित) – चतुर्थकाण्डे – सप्तमः प्रश्नः

ओं नमः परमात्मने, श्री महागणपतये नमः,

श्री गुरुभ्यो नमः , हरिः ओं

4 कृष्ण यजुर्वेदीय तैत्तिरीय संहितायां पद पाठे चतुर्थ काण्डं

4.7 चतुर्थकाण्डे सप्तमः प्रश्नः – वसोर्धारादिशिष्ट

संस्काराभिधानं

TS 4.7.1.1

अ॒ग्ना॒विष्णू॑ स॒जोष॑से॒मा व॑र्द्धन्तु वां गिरः ।

द्यु॒म्नैर्वा॑जेभि॒-रा ग॑तं ॥

वा॒जश्च॑ मे प्र॒सव॑श्च मे प्र॒यति॑श्च मे प्र॒सिति॑श्च मे

धी॒तिश्च॑ मे क्र॒तुश्च॑ मे स्वर॑श्च मे श्लो॒कश्च॑ मे

श्रा॒वश्च॑ मे श्रु॒तिश्च॑ मे ज्यो॒तिश्च॑ मे सु॒वश्च॑ मे

प्रा॒णश्च॑ मे ऽपान॑ – [] 1

TS 4.7.1.1 - Padam

अ॒ग्ना॒वि॒ष्णू॒ इत्य॑ग्ना॒ – वि॒ष्णू॒ । स॒जोष॑सेति॒ स – जोष॑सा । इ॒माः ।
व॒र्द्ध॒न्तु॒ । वा॒म् । गि॒रः ॥ द्यु॒म्नैः॑ । वा॒जेभिः॑ । ए॒ति॑ । ग॒तम् ॥ वा॒जः ।
च॒ । मे॒ । प्र॒स॒व इति॑ प्र॒-स॒वः । च॒ । मे॒ । प्र॒य॒तिरिति॑ प्र॒-य॒तिः । च॒ ।
मे॒ । प्र॒सि॒तिरिति॑ प्र॒-सि॒तिः । च॒ । मे॒ । धी॒तिः । च॒ । मे॒ । क्र॒तुः । च॒ ।
मे॒ । स्वरः॑ । च॒ । मे॒ । श्लो॒कः । च॒ । मे॒ । श्रा॒वः ।
च॒ । मे॒ । श्रु॒तिः । च॒ । मे॒ । ज्यो॒तिः । च॒ । मे॒ । सु॒वः । च॒ । मे॒ ।
प्रा॒ण इति॑ प्र – अ॒नः । च॒ । मे॒ । अ॒पा॒न इत्य॑प – अ॒नः । 1 (50)

TS 4.7.1.2

–श्च॑ मे॒ व्या॒नश्च॑ मे॒ ऽसु॑श्च॒ मे॒ चि॒त्तं च॑ म॒ आ॒धी॒तं च॑ मे॒ वा॒क्च॑ मे॒
म॒नश्च॑ मे॒ चक्षु॑श्च॒ मे॒ श्रो॒त्रं च॑ मे॒ दक्ष॑श्च॒ मे॒ ब॒लं च॑ म॒
ओ॒जश्च॑ मे॒ स॒हश्च॑ म॒ आ॒युश्च॑ मे॒ ज॒रा च॑ म॒ आ॒त्मा च॑ मे॒
त॒नूश्च॑ मे॒ () श॒र्म च॑ मे॒ वर्म॑ च॒ मे॒ ऽङ्गा॑नि च॒ मे॒ ऽस्थानि॑ च॒ मे॒
प॒रू॒षि च॑ मे॒ शरी॑राणि च॒ मे॒ ॥ 2

TS 4.7.1.2 - Padam

च॒ । मे॒ । व्या॒न इति॑ वि-अ॒नः । च॒ । मे॒ । अ॒सुः । च॒ । मे॒ । चि॒त्तम् ।
च॒ । मे॒ । आ॒धी॒त॒मित्या॑-धी॒तम् । च॒ । मे॒ । वाक् । च॒ । मे॒ । म॒नः ।
च॒ । मे॒ । चक्षुः॑ । च॒ । मे॒ । श्रो॒त्रम् । च॒ । मे॒ । दक्षः॑ । च॒ । मे॒ ।
ब॒लम् । च॒ । मे॒ । ओजः॑ । च॒ । मे॒ । स॒हः । च॒ । मे॒ । आ॒युः । च॒ ।
मे॒ । ज॒रा । च॒ । मे॒ । आ॒त्मा । च॒ । मे॒ । त॒नूः । च॒ । मे॒ () । श॒र्म ।
च॒ । मे॒ । वर्म॑ । च॒ । मे॒ । अ॒ङ्गानि॑ । च॒ । मे॒ । अ॒स्थानि॑ ।
च॒ । मे॒ । प॒रू॒षि । च॒ । मे॒ । श॒री॒राणि । च॒ । मे॒ ॥ 2 (68)

(अ॒पान॑ - स्त॒नूश्च॑ मे॒ - ऽष्टा॑द॒श च॑) (A1)

TS 4.7.2.1

ज्यैष्ठ्यं॑ च॒ म॒ आ॒धि॒प॒त्यं च॑ मे॒ म॒न्युश्च॑ मे॒ भा॒मश्च॑ मे॒
ऽम॑श्च॒ मे॒ ऽम्भ॑श्च॒ मे॒ जे॒मा च॑ मे॒ म॒हि॒मा च॑ मे॒ व॒रि॒मा च॑ मे॒
प्र॒थि॒मा च॑ मे॒ व॒र्ष्मा च॑ मे॒ द्रा॒घु॒या च॑ मे॒ वृ॒द्धं च॑ मे॒
वृ॒द्धिश्च॑ मे॒ स॒त्यं च॑ मे॒ श्र॒द्धा च॑ मे॒ ज॒गच्च॑ - [] 3

TS 4.7.2.1 - Padam

ज्यैष्ठ्यम् । च । मे । आधिपत्यमित्याधि-पत्यम् । च । मे । मन्युः ।
च । मे । भामः । च । मे । अमः । च । मे । अंभः । च । मे ।
जेमा । च । मे । महिमा । च । मे । वरिमा । च । मे । प्रथिमा ।
च । मे । वर्षा । च । मे । द्राघुया । च । मे । वृद्धम् । च । मे ।
वृद्धिः । च । मे । सत्यम् । च । मे । श्रद्धेति श्रत् - धा । च । मे ।
जगत् । च । 3 (50)

TS 4.7.2.2

-मे धनं च मे वशश्च मे त्विषिश्च मे क्रीडा च मे
मोदश्च मे जातं च मे जनिष्यमाणं च मे सूक्तं च मे
सुकृतं च मे वित्तं च मे वेद्यं च मे भूतं च मे भविष्यच्च मे
सुगं च मे सुपथं च म ऋद्धं च म ऋद्धि () च मे क्लृप्तं च मे
क्लृप्तिश्च मे मतिश्च मे सुमतिश्च मे ॥ 4

TS 4.7.2.2 - Padam

मे॒ । ध॒न॒म् । च॒ । मे॒ । व॒शः॑ । च॒ । मे॒ । त्वि॒षिः॑ । च॒ । मे॒ । क्री॒डा ।
च॒ । मे॒ । मो॒दः॑ । च॒ । मे॒ । जा॒त॒म् । च॒ । मे॒ । ज॒नि॒ष्य॒मा॒ण॒म् । च॒ ।
मे॒ । सू॒क्त॒मि॒ति॑ सु॒ – उ॒क्त॒म् । च॒ । मे॒ । सु॒कृ॒त॒मि॒ति॑ सु॒ – कृ॒त॒म् ।
च॒ । मे॒ । वि॒त्त॒म् । च॒ । मे॒ । वे॒द्य॒म् । च॒ । मे॒ । भू॒त॒म् । च॒ । मे॒ ।
भ॒वि॒ष्य॒त् । च॒ । मे॒ । सु॒ग॒मि॒ति॑ सु॒ – ग॒म् । च॒ । मे॒ । सु॒प॒थ॒मि॒ति॑
सु॒ – प॒थ॒म् । च॒ । मे॒ । ऋ॒द्ध॒म् । च॒ । मे॒ । ऋ॒द्धिः॑ () । च॒ । मे॒ ।
क्लृ॒प्त॒म् । च॒ । मे॒ । क्लृ॒प्तिः॑ । च॒ । मे॒ । म॒तिः॑ । च॒ । मे॒ ।
सु॒म॒ति॒रि॒ति॑ सु॒ – म॒तिः॑ । च॒ । मे॒ ॥ 4 (64)

(ज॒ग॒च्च॑ – ऋ॒द्धि॑ – श्रु॒तु॒र्द॒श॑ च) (A2)

TS 4.7.3.1

शं॑ च॒ मे॒ म॒य॒श्च॑ मे॒ प्रि॒यं॑ च॒ मे॒ ऽनु॒का॒म॒श्च॑ मे॒ का॒म॒श्च॑ मे॒
सौ॒म॒न॒स॒श्च॑ मे॒ भ॒द्रं॑ च॒ मे॒ श्रे॒य॒श्च॑ मे॒ व॒स्य॑श्च॒ मे॒
य॒श॑श्च॒ मे॒ भ॒ग॒श्च॑ मे॒ द्र॒वि॒णं॑ च॒ मे॒ य॒न्ता॑ च॒ मे॒ ध॒र्ता॑ च॒ मे॒
क्षे॒म॒श्च॑ मे॒ धृ॒ति॑श्च॒ मे॒ वि॒श्वं॑ च॒ – [] 5

TS 4.7.3.1 - Padam

शम् । च । मे । मयः । च । मे । प्रियम् । च । मे । अनुकाम
इत्यनु – कामः । च । मे । कामः । च । मे । सौमनसः । च । मे ।
भद्रम् । च । मे । श्रेयः । च । मे । वस्यः । च । मे । यशः । च ।
मे । भगः । च । मे । द्रविणम् । च । मे । यन्ता । च । मे । धर्ता ।
च । मे । क्षेमः । च । मे । धृतिः । च । मे । विश्वम् । च । 5 (50)

TS 4.7.3.2

मे महश्च मे सँविच्च मे ज्ञात्रं च मे सूश्च मे प्रसूश्च मे
सीरं च मे लयश्च म ऋतं च मे ऽमृतं च मे ऽयक्ष्मं च मे
ऽनामयच्च मे जीवातुश्च मे दीर्घायुत्वं च मे ऽनमित्रं च मे
ऽभयं च मे सुगं च मे शयनं () च मे सूषा च मे सुदिनं च मे ॥ 6

TS 4.7.3.2 - Padam

मे । महः । च । मे । सँविदिति सम्-वित् । च । मे । ज्ञात्रम् । च ।
मे । सूः । च । मे । प्रसूरिति प्र – सूः । च । मे । सीरं । च । मे ।
लयः । च । मे । ऋतम् । च । मे । अमृतम् । च । मे ।
अयक्ष्मम् । च । मे । अनामयत् । च । मे । जीवातुः । च । मे ।

पद पाठे (वाक्य सहित) – चतुर्थकाण्डे – सप्तमः प्रश्नः

दी॒र्घायु॑त्वमि॒ति दी॒र्घायु॑ – त्वम् । च॒ । मे॒ । अ॒न॒मि॒त्रम् । च॒ । मे॒ ।
अ॒भय॑म् । च॒ । मे॒ । सु॒गमि॑ति सु॒-गम् । च॒ । मे॒ । श॒यन॑म् () । च॒ ।
मे॒ । सू॒षेति॑ सु॒ – उ॒षा । च॒ । मे॒ । सु॒दि॒नमि॑ति सु॒ – दि॒नम् । च॒ ।
मे॒ ॥ 6 (58) (वि॒श्वं च॑ – श॒यन॑ – म॒ष्टौ च॑) (A3)

TS 4.7.4.1

ऊ॒र्क्च॑ मे॒ सू॒नृता॑ च॒ मे॒ प॒यश्च॑ मे॒ र॒सश्च॑ मे॒ घृ॒तं च॑ मे॒ म॒धु च॑ मे॒
स॒ग्धिश्च॑ मे॒ स॒पी॒तिश्च॑ मे॒ कृ॒षिश्च॑ मे॒ वृ॒ष्टिश्च॑ मे॒ जै॒त्रं च॑ म॒ औ॒द्भि॒द्यं च॑
मे॒ र॒यिश्च॑ मे॒ रा॒यश्च॑ मे॒ पु॒ष्टं च॑ मे॒ पु॒ष्टिश्च॑ मे॒ वि॒भु च॑ – [] 7

TS 4.7.4.1 - Padam

ऊ॒र्क् । च॒ । मे॒ । सू॒नृता॑ । च॒ । मे॒ । प॒यः । च॒ । मे॒ । र॒सः । च॒ ।
मे॒ । घृ॒तम् । च॒ । मे॒ । म॒धु । च॒ । मे॒ । स॒ग्धिः । च॒ । मे॒ ।
स॒पी॒तिरि॒ति स॒ – पी॒तिः । च॒ । मे॒ । कृ॒षिः । च॒ । मे॒ । वृ॒ष्टिः । च॒ ।
मे॒ । जै॒त्रम् । च॒ । मे॒ । औ॒द्भि॒द्यमि॒त्यौत्-भि॒द्यम् । च॒ । मे॒ । र॒यिः ।
च॒ । मे॒ । रा॒यः । च॒ । मे॒ । पु॒ष्टम् । च॒ । मे॒ । पु॒ष्टिः । च॒ । मे॒ ।
वि॒भ्विति॑ वि॒ – भु॒ । च॒ । 7 (50)

TS 4.7.4.2

मे प्र॒भु च॑ मे बहु॑ च॒ मे भू॒यश्च॑ मे पूर्ण॑ च॒ मे पूर्ण॑तरं च॒ मे
ऽक्षि॑तिश्च॒ मे कू॒यवाश्च॑ मेऽन्नं॑ च॒ मे ऽक्षु॑च्च॒ मे व्री॒हयश्च॑ मे
यवा॑श्च॒ मे मा॒षाश्च॑ मे ति॒लाश्च॑ मे मु॒द्गाश्च॑ मे ख॒ल्वाश्च॑ मे
गो॒धूमाश्च॑ मे म॒सुरा॑- () -श्च॒ मे प्रि॒यंग॑वश्च॒ मे ऽण॑वश्च॒ मे
श्या॒माका॑श्च॒ मे नी॒वारा॑श्च॒ मे ॥ 8

TS 4.7.4.2 - Padam

मे । प्र॒भ्वि॑ति प्र - भु । च॒ । मे । बहु॑ । च॒ । मे । भू॒यः । च॒ । मे ।
पूर्ण॑म् । च॒ । मे । पूर्ण॑तरमि॒ति पूर्ण॑ - तरम् । च॒ । मे । अक्षि॑तिः ।
च॒ । मे । कू॒यवाः । च॒ । मे । अन्न॑म् । च॒ । मे । अक्षु॑त् । च॒ । मे ।
व्री॒हयः । च॒ । मे । यवाः । च॒ । मे । मा॒षाः । च॒ । मे । ति॒लाः ।
च॒ । मे । मु॒द्गाः । च॒ । मे । ख॒ल्वाः । च॒ । मे । गो॒धूमाः । च॒ ।
मे । म॒सुराः () । च॒ । मे । प्रि॒यंग॑वः । च॒ । मे । अण॑वः । च॒ ।
मे । श्या॒माकाः । च॒ । मे । नी॒वाराः । च॒ । मे ॥ 8 (64)

(वि॒भु च॑ - म॒सुरा - श्रु॑तु॒र्दश॑ च) (A4)

TS 4.7.5.1

अ॒श्मा च॒ मे मृ॒त्तिका च॒ मे गि॒रयश्च॒ मे पर्व॑ताश्च॒ मे सि॒क॒ताश्च॒ मे
व॒न॒स्प॒तयश्च॒ मे हि॒रण्यं च॒ मे ज्यश्च॒ मे सी॒सं च॒ मे त्र॒पुश्च॒ मे
श्या॒मं च॒ मे लो॒हं च॒ मे अ॒ग्निश्च॒ म आप॑श्च॒ मे वी॒रुधश्च॒ म
ओष॑धयश्च॒ मे कृ॒ष्टप॑च्यं च॒ – [] 9

TS 4.7.5.1 - Padam

अ॒श्मा । च॒ । मे॒ । मृ॒त्तिका । च॒ । मे॒ । गि॒रयः । च॒ । मे॒ । पर्व॑ताः ।
च॒ । मे॒ । सि॒क॒ताः । च॒ । मे॒ । व॒न॒स्प॒तयः । च॒ । मे॒ । हि॒रण्यम् ।
च॒ । मे॒ । अ॒यः । च॒ । मे॒ । सी॒सम् । च॒ । मे॒ । त्र॒पु । च॒ । मे॒ ।
श्या॒मम् । च॒ । मे॒ । लो॒हम् । च॒ । मे॒ । अ॒ग्निः । च॒ । मे॒ । आपः॑ ।
च॒ । मे॒ । वी॒रुधः । च॒ । मे॒ । ओष॑धयः । च॒ । मे॒ ।
कृ॒ष्टप॑च्यमिति कृष्ट – प॒च्यम् । च॒ । 9 (50)

TS 4.7.5.2

मे ऽकृ॒ष्टप॑च्यं च॒ मे ग्रा॒म्याश्च॒ मे प॒शव॑ आ॒र॒ण्याश्च॒ य॒ज्ञेन॑ क॒ल्पन्तां॑
वि॒त्तं च॒ मे वि॒त्तिश्च॒ मे भू॒तं च॒ मे भू॒तिश्च॒ मे व॒सु च॒ मे व॒स॒तिश्च॒ मे
क॒र्म च॒ मे श॒क्तिश्च॒ मे अ॒र्थश्च॒ म ए॒मश्च॒ म इ॒तिश्च॒ मे ग॒तिश्च॒ मे ॥ 10

TS 4.7.5.2 - Padam

मे । अ॒कृ॒ष्ट॒प॒च्य॒मि॒त्य॒कृ॒ष्ट – प॒च्य॒म् । च । मे । ग्रा॒म्याः । च । मे ।
प॒शवः । आ॒र॒ण्याः । च । य॒ज्ञेन । क॒ल्प॒न्ता॒म् । वि॒त्त॒म् । च । मे ।
वि॒त्तिः । च । मे । भू॒त॒म् । च । मे । भू॒तिः । च । मे । व॒सु । च ।
मे । व॒स॒तिः । च । मे । क॒र्म । च । मे । श॒क्तिः । च । मे । अ॒र्थः ।
च । मे । ए॒मः । च । मे । इ॒तिः । च । मे । ग॒तिः । च ।

मे ॥ 10 (48) (कृ॒ष्ट॒प॒च्यं॒ चा – षा॒च॒त्वा॒रि॒श॒च्य) (A5)

TS 4.7.6.1

अ॒ग्नि॒श्च म॒ इन्द्र॑श्च मे सोम॑श्च म॒ इन्द्र॑श्च मे
स॒वि॒ता च म॒ इन्द्र॑श्च मे स॒र॒स्व॒ती च म॒ इन्द्र॑श्च मे
पू॒षा च म॒ इन्द्र॑श्च मे बृ॒ह॒स्प॒ति॒श्च म॒ इन्द्र॑श्च मे
मि॒त्र॒श्च म॒ इन्द्र॑श्च मे व॒रु॒णश्च म॒ इन्द्र॑श्च मे त्व॒ष्टा च – [] 11

TS 4.7.6.1 - Padam

अ॒ग्निः । च । मे । इन्द्रः॑ । च । मे । सोमः॑ । च । मे । इन्द्रः॑ । च ।
मे । स॒वि॒ता । च । मे । इन्द्रः॑ । च । मे । स॒र॒स्व॒ती । च । मे ।
इन्द्रः॑ । च । मे । पू॒षा । च । मे । इन्द्रः॑ । च । मे । बृ॒ह॒स्प॒तिः ।

पद पाठे (वाक्य सहित) – चतुर्थकाण्डे – सप्तमः प्रश्नः

च॒ । मे॒ । इन्द्रः॑ । च॒ । मे॒ । मि॒त्रः । च॒ । मे॒ । इन्द्रः॑ । च॒ । मे॒ ।
वरु॑णः । च॒ । मे॒ । इन्द्रः॑ । च॒ । मे॒ । त्वष्टा॑ । च॒ । 11 (50)

TS 4.7.6.2

म॒ इन्द्र॑श्च मे॒ धा॒ता च॒ म॒ इन्द्र॑श्च मे॒
विष्णु॑श्च म॒ इन्द्र॑श्च मे॒ अ॒श्विनौ॑ च॒ म॒ इन्द्र॑श्च मे॒
म॒रुत॑श्च म॒ इन्द्र॑श्च मे॒ विश्वे॑ च॒ मे॒ दे॒वा इन्द्र॑श्च मे॒
पृ॒थि॒वी च॒ म॒ इन्द्र॑श्च मे॒ अ॒न्तरि॑क्षं च॒ म॒ इन्द्र॑श्च मे॒
द्यौश्च॑ म॒ () इन्द्र॑श्च मे॒ दि॒शश्च॑ म॒ इन्द्र॑श्च मे॒
मूर्ध्ना॑ च॒ म॒ इन्द्र॑श्च मे॒ प्र॒जाप॑तिश्च म॒ इन्द्र॑श्च मे॒ ॥ 12

TS 4.7.6.2 - Padam

मे॒ । इन्द्रः॑ । च॒ । मे॒ । धा॒ता । च॒ । मे॒ । इन्द्रः॑ । च॒ । मे॒ । विष्णुः॑ ।
च॒ । मे॒ । इन्द्रः॑ । च॒ । मे॒ । अ॒श्विनौ॑ । च॒ । मे॒ । इन्द्रः॑ । च॒ । मे॒ ।
म॒रुतः॑ । च॒ । मे॒ । इन्द्रः॑ । च॒ । मे॒ । विश्वे॑ । च॒ । मे॒ । दे॒वाः ।
इन्द्रः॑ । च॒ । मे॒ । पृ॒थि॒वी । च॒ । मे॒ । इन्द्रः॑ । च॒ । मे॒ । अ॒न्तरि॑क्षम् ।
च॒ । मे॒ । इन्द्रः॑ । च॒ । मे॒ । द्यौः॑ । च॒ । मे॒ () । इन्द्रः॑ । च॒ । मे॒ ।

दि॒शः । च॒ । मे॒ । इन्द्रः॑ । च॒ । मे॒ । मूर्द्धा॑ । च॒ । मे॒ । इन्द्रः॑ । च॒ ।
मे॒ । प्र॒जाप॒तिरि॒ति प्र॒जा – प॒तिः । च॒ । मे॒ । इन्द्रः॑ ।
च॒ । मे॒ ॥ 12 (71) (त्व॒ष्टा च॒ – द्यौश्च॑ म॒ – एक॑विंशतिश्च) (A6)

TS 4.7.7.1

अ॒ञ्शुश्च॑ मे॒ रश्मि॑श्च मे॒ ऽदा॒भ्यश्च॑ मे॒ ऽधि॑पतिश्च म॒
उपा॒ञ्शुश्च॑ मे॒ ऽन्तर्या॑मश्च म॒ ऐन्द्र॑वायवश्च मे॒
मै॒त्रावरु॑णश्च म॒ आ॒श्विन॑श्च मे॒ प्र॒तिप्र॑स्थानश्च मे॒ शु॒क्रश्च॑ मे॒
म॒न्थी च॒ म॒ आ॒ग्रय॑णश्च मे॒ वै॒श्वदे॒वश्च॑ मे॒ ध्रु॒वश्च॑ मे॒
वै॒श्वान॑रश्च म॒ ऋ॒तुग्र॑हाश्च – [] 13

TS 4.7.7.1 - Padam

अ॒ञ्शुः । च॒ । मे॒ । रश्मिः॑ । च॒ । मे॒ । अ॒दा॒भ्यः । च॒ । मे॒ ।
अ॒धि॑पतिरित्यधि – प॒तिः । च॒ । मे॒ । उपा॒ञ्शुरि॒त्युप॑ – अ॒ञ्शुः । च॒ ।
मे॒ । अ॒न्तर्या॑म इत्यन्तः – या॒मः । च॒ । मे॒ । ऐन्द्र॑वायव इत्यैन्द्र – वा॒यवः॑ ।
च॒ । मे॒ । मै॒त्रावरु॑ण इति मै॒त्रा – व॒रुणः॑ । च॒ । मे॒ । आ॒श्विनः॑ । च॒ ।
मे॒ । प्र॒तिप्र॑स्थान इति प्र॒ति – प्र॒स्थानः॑ । च॒ । मे॒ । शु॒क्रः । च॒ । मे॒ ।

मन्थी । च । मे । आग्रयणः । च । मे । वैश्वदेव इति वैश्व – देवः ।

च । मे । ध्रुवः । च । मे । वैश्वानरः । च । मे ।

ऋतुग्रहा इत्यृतु – ग्रहाः । च । 13 (50)

TS 4.7.7.2

मे अतिग्राह्याश्च म ऐन्द्राग्नश्च मे वैश्वदेवश्च मे
मरुत्वतीयाश्च मे माहेन्द्रश्च म आदित्यश्च मे सावित्रश्च मे
सारस्वतश्च मे पौष्णश्च मे पालीवतश्च मे हारियोजनश्च मे ॥ 14

TS 4.7.7.2 - Padam

मे । अतिग्राह्या इत्यति-ग्राह्याः । च । मे । ऐन्द्राग्न इत्यैन्द्र-अग्नः ।
च । मे । वैश्वदेव इति वैश्व – देवः । च । मे । मरुत्वतीयाः । च ।
मे । माहेन्द्र इति माहा – इन्द्रः । च । मे । आदित्यः । च । मे ।
सावित्रः । च । मे । सारस्वतः । च । मे । पौष्णः । च । मे ।
पालीवत इति पाली-वतः । च । मे । हारियोजन इति हारि-योजनः ।
च । मे ॥ 14 (34)

(ऋतुग्रहाश्च – चतुस्त्रिंशच्च) (A7)

TS 4.7.8.1

इ॒ध्मश्च॑ मे॒ ब॒र्हिश्च॑ मे॒ वेदि॑श्च मे॒ धिष्णि॑याश्च मे॒
सु॒चश्च॑ मे॒ च॒म॒साश्च॑ मे॒ ग्रा॒वा॒णश्च॑ मे॒ स्वर॑वश्च म॒
उ॒प॒र॒वाश्च॑ मे॒ अ॒धि॒ष॒व॒णे च॑ मे॒ द्रो॒ण॒क॒ल॒शश्च॑ मे॒
वा॒य॒व्या॒नि च॑ मे॒ पू॒त॒भृ॒च्च म॑ आ॒ध॒व॒नी॒यश्च॑ म॒ आ॒ग्नी॑द्धं च॒ मे॒
ह॒वि॒र्द्धानं॑ च॒ मे॒ गृ॒हाश्च॑ () मे॒ स॒दश्च॑ मे॒ पु॒रो॒डा॒शाश्च॑ मे॒
प॒च॒ताश्च॑ मे॒ऽव॒भृ॒थश्च॑ मे॒ स्व॒गा॒का॒रश्च॑ मे॒ ॥ 15

TS 4.7.8.1 - Padam

इ॒ध्मः । च॒ । मे॒ । ब॒र्हिः । च॒ । मे॒ । वे॒दिः । च॒ । मे॒ । धि॒ष्णि॑याः ।
च॒ । मे॒ । सु॒चः । च॒ । मे॒ । च॒म॒साः । च॒ । मे॒ । ग्रा॒वा॒णः । च॒ । मे॒ ।
स्वर॑वः । च॒ । मे॒ । उ॒प॒र॒वा इत्यु॑प – र॒वाः । च॒ । मे॒ । अ॒धि॒ष॒व॒णे
इत्य॑धि – स॒व॒ने । च॒ । मे॒ । द्रो॒ण॒क॒ल॒श इति॑ द्रो॒ण॒क॒ल॒शः । च॒ ।
मे॒ । वा॒य॒व्या॒नि । च॒ । मे॒ । पू॒त॒भृ॒दिति॑ पू॒त – भृ॒त् । च॒ । मे॒ ।
आ॒ध॒व॒नी॒य इत्या॑ – ध॒व॒नी॒यः । च॒ । मे॒ ।

पद पाठे (वाक्य सहित) – चतुर्थकाण्डे – सप्तमः प्रश्नः

आ॒ग्नी॒ध्र॒मि॒त्याग्नि॑-इ॒ध्र॒म् । च॒ । मे॒ । ह॒वि॒र्ध्वान॑मि॒ति
ह॒विः॑ - धान॒म् । च॒ । मे॒ । गृ॒हाः । च॒ () । मे॒ । स॒दः॑ । च॒ । मे॒ ।
पु॒रोडा॑शाः । च॒ । मे॒ । प॒च॒ताः । च॒ । मे॒ । अ॒व॒भृ॒थ इ॒त्यव॑ - भृ॒थः ।
च॒ । मे॒ । स्व॒गा॒का॒र इ॒ति स्व॒गा - का॒रः । च॒ । मे॒ ॥ 15 (66)

(गृ॒हाश्च॑ - षोड॑श च) (A8)

TS 4.7.9.1

अ॒ग्निश्च॑ मे॒ घ॒र्मश्च॑ मे॒ऽर्क॑श्च॒ मे॒ सूर्य॑श्च॒ मे॒
प्रा॒णश्च॑ मे॒ ऽश्व॑मे॒धश्च॑ मे॒ पृ॒थि॒वी च॒ मे॒ ऽदि॑तिश्च॒ मे॒
दि॒तिश्च॑ मे॒ द्यौश्च॑ मे॒ श॒क्व॒रीर॒ङ्गुल॑यो दि॒शश्च॑ मे॒
य॒ज्ञेन॑ क॒ल्पन्ता॑- मृ॒क्च॑ मे॒ सा॒म च॒ मे॒ स्तो॒मश्च॑ मे॒
य॒जुश्च॑ मे॒ दी॒क्षा () च॒ मे॒ तप॑श्च॒ म ऋ॒तुश्च॑ मे॒ व्र॒तं च॒ मे॒
ऽहो॒रा॒त्रयो॑र् वृ॒ष्ट्या बृ॒ह॒द्र॒थन्त॑रे च॒ मे॒ य॒ज्ञेन॑ क॒ल्पेतां॑ ॥ 16

TS 4.7.9.1 - Padam

अ॒ग्निः । च॒ । मे॒ । घ॒र्मः । च॒ । मे॒ । अ॒र्कः । च॒ । मे॒ । सूर्यः॑ । च॒ ।
मे॒ । प्रा॒ण इ॒ति प्र॑ - अ॒नः । च॒ । मे॒ । अ॒श्व॑मे॒ध इ॒त्यश्व॑-मे॒धः । च॒ ।

मे । पृ॒थि॒वी । च॒ । मे॒ । अ॒दि॒तिः । च॒ । मे॒ । दि॒तिः । च॒ । मे॒ ।
 द्यौः । च॒ । मे॒ । श॒क्व॒रीः । अ॒ङ्गु॒लयः । दि॒शः । च॒ । मे॒ । य॒ज्ञेन॑ ।
 क॒ल्प॒न्ता॒म् । ऋक् । च॒ । मे॒ । सा॒म । च॒ । मे॒ । स्तो॒मः । च॒ । मे॒ ।
 य॒जुः । च॒ । मे॒ । दी॒क्षा () । च॒ । मे॒ । त॒पः । च॒ । मे॒ । ऋ॒तुः ।
 च॒ । मे॒ । व्र॒तम् । च॒ । मे॒ । अ॒हो॒रा॒त्रयो॒रित्य॑हः – रा॒त्रयोः॑ । वृ॒ष्ट्या ।
 बृ॒ह॒द्र॒थ॒न्त॒रे इति॑ बृ॒हत् – र॒थ॒न्त॒रे । च॒ । मे॒ । य॒ज्ञेन॑ ।

क॒ल्पे॒ता॒म् ॥ 16 (68) (दी॒क्षा – ष॒ष्टाद॒श च॑) (A9)

TS 4.7.10.1

ग॒र्भाश्च॑ मे॒ व॒थ्साश्च॑ मे॒ त्र्य॒विश्च॑ मे॒ त्र्य॒वी च॑ मे॒ दि॒त्य॒वाट् च॑ मे॒ दि॒त्यौ॒ही
 च॑ मे॒ प॒ञ्चा॒विश्च॑ मे॒ प॒ञ्चा॒वी च॑ मे॒ त्रि॒व॒थ्सश्च॑ मे॒ त्रि॒व॒थ्सा च॑ मे॒
 तु॒र्य॒वाट् च॑ मे॒ तु॒र्यौ॒ही च॑ मे॒ प॒ष्ठ॒वाच् च॑ मे॒ प॒ष्ठौ॒ही च॑ म॒ उ॒क्षा च॑ मे॒
 व॒शा च॑ म॒ ऋ॒षभ॑श्च – [] 17

TS 4.7.10.1 - Padam

ग॒र्भाः । च॒ । मे॒ । व॒थ्साः । च॒ । मे॒ । त्र्य॒वि॒रि॒ति॑ त्रि – अ॒विः । च॒ ।
 मे॒ । त्र्य॒वी॒ति॑ त्रि – अ॒वी । च॒ । मे॒ । दि॒त्य॒वा॒डि॒ति॑ दि॒त्य – वाट् ।

पद पाठे (वाक्य सहित) – चतुर्थकाण्डे – सप्तमः प्रश्नः

च॒ । मे॒ । दि॒त्यौ॒ही । च॒ । मे॒ । प॒ञ्चा॒वि॒रि॒ति॒ प॒ञ्च॒ – अ॒विः॒ । च॒ ।
मे॒ । प॒ञ्चा॒वी॒ति॒ प॒ञ्च॒-अ॒वी॒ । च॒ । मे॒ । त्रि॒व॒थ्स॒ इति॑ त्रि॒-व॒थ्सः॒ ।
च॒ । मे॒ । त्रि॒व॒थ्स॒ेति॑ त्रि॒ – व॒थ्स॒ा । च॒ । मे॒ । तु॒र्य॒वा॒डि॒ति॑
तु॒र्य॒ – वा॒ट् । च॒ । मे॒ । तु॒र्यौ॒ही । च॒ । मे॒ । प॒ष्ठ॒वा॒दि॒ति॑ प॒ष्ठ॒ – वा॒त् ।
च॒ । मे॒ । प॒ष्ठौ॒ही । च॒ । मे॒ । उ॒क्षा॒ । च॒ । मे॒ । व॒शा॒ । च॒ । मे॒ ।

ऋ॒षभः॒ । च॒ । 17 (50)

TS 4.7.10.2

मे॒ वे॒ह॒च्च॒ मे॒ ऽन॒ड्वान्॑ च॒ मे॒ धे॒नुश्च॑ म॒ आ॒यु॒र्य॒ज्ञेन॑ क॒ल्पतां॑ प्रा॒णो
य॒ज्ञेन॑ क॒ल्पता॑-म॒पानो॑ य॒ज्ञेन॑ क॒ल्पतां॑ व्या॒नो य॒ज्ञेन॑ क॒ल्पतां॑
चक्षु॑र् य॒ज्ञेन॑ क॒ल्पता॑ श्रो॒त्रं य॒ज्ञेन॑ क॒ल्पतां॑ मनो॑ य॒ज्ञेन॑ क॒ल्पतां॑
वाग् य॒ज्ञेन॑ क॒ल्पता॑-मा॒त्मा य॒ज्ञेन॑ क॒ल्पतां॑ य॒ज्ञो य॒ज्ञेन॑ क॒ल्पतां॑ ॥ 18

TS 4.7.10.2 - Padam

मे॒ । वे॒ह॒त् । च॒ । मे॒ । अ॒न॒ड्वान्॑ । च॒ । मे॒ । धे॒नुः॒ । च॒ । मे॒ ।
आ॒युः॒ । य॒ज्ञेन॑ । क॒ल्पता॑म् । प्रा॒ण इति॑ प्र॒ – अ॒नः॒ । य॒ज्ञेन॑ ।

क॒ल्प॒ताम् । अ॒पा॒न इ॒त्य॒प – अ॒नः । य॒ज्ञे॒न । क॒ल्प॒ताम् । व्या॒न इ॒ति
वि – अ॒नः । य॒ज्ञे॒न । क॒ल्प॒ताम् । चक्षुः । य॒ज्ञे॒न । क॒ल्प॒ताम् ।
श्रो॒त्रम् । य॒ज्ञे॒न । क॒ल्प॒ताम् । म॒नः । य॒ज्ञे॒न । क॒ल्प॒ताम् । वाक् ।
य॒ज्ञे॒न । क॒ल्प॒ताम् । आ॒त्मा । य॒ज्ञे॒न । क॒ल्प॒ताम् । य॒ज्ञः । य॒ज्ञे॒न ।

क॒ल्प॒ताम् ॥ 18 (40)

(ऋषभश्च – चत्वारिंशच्च) (A10)

TS 4.7.11.1

एका॑ च॒ मे॒ तिस्र॑श्च॒ मे॒ पञ्च॑ च॒ मे॒ सप्त॑ च॒ मे॒
नव॑ च॒ म॒ एका॑दश च॒ मे॒ त्रयो॑दश च॒ मे॒ पञ्च॑दश च॒ मे॒
सप्त॑दश च॒ मे॒ नव॑दश च॒ म॒ एक॑विंशतिश्च॒ मे॒
त्रयो॑विंशतिश्च॒ मे॒ पञ्च॑विंशतिश्च॒ मे॒ सप्त॑विंशतिश्च॒ मे॒
नव॑विंशतिश्च॒ म॒ एक॑त्रिंशच्च॒ मे॒ त्रय॑स्त्रिंशच्च – [] 19

TS 4.7.11.1 - Padam

एका॑ । च॒ । मे॒ । तिस्रः॑ । च॒ । मे॒ । पञ्च॑ । च॒ । मे॒ । सप्त॑ । च॒ ।
मे॒ । नव॑ । च॒ । मे॒ । एका॑दश । च॒ । मे॒ । त्रयो॑दशेति॒ त्रयः॑ – द॒श ।

पद पाठे (वाक्य सहित) – चतुर्थकाण्डे – सप्तमः प्रश्नः

च॒ । मे॒ । पञ्च॑द॒शेति॑ पञ्च॑-द॒श । च॒ । मे॒ । सप्त॑द॒शेति॑
सप्त॑ - द॒श । च॒ । मे॒ । नव॑द॒शेति॑ नव॑ - द॒श । च॒ । मे॒ ।
एक॑वि॒ंशति॑रित्येक॑ - वि॒ंशतिः॑ । च॒ । मे॒ । त्रयो॑वि॒ंशति॑रिति॑
त्रयः॑-वि॒ंशतिः॑ । च॒ । मे॒ । पञ्च॑वि॒ंशति॑रिति॑ पञ्च॑-वि॒ंशतिः॑ ।
च॒ । मे॒ । सप्त॑वि॒ंशति॑रिति॑ सप्त॑ - वि॒ंशतिः॑ । च॒ । मे॒ ।
नव॑वि॒ंशति॑रिति॑ नव॑ - वि॒ंशतिः॑ । च॒ । मे॒ ।
एक॑त्रि॒ंशदि॒त्येक॑ - त्रि॒ंशत् । च॒ । मे॒ ।
त्रय॑स्त्रि॒ंशदि॒ति त्रयः॑ - त्रि॒ंशत् । च॒ । 19 (50)

TS 4.7.11.2

मे॒ चत॑स्रश्च॒ मे॒ ऽष्टौ॑ च॒ मे॒ द्वाद॑श च॒ मे॒
षोड॑श च॒ मे॒ वि॒ंशति॑श्च॒ मे॒ चतु॑र्वि॒ंशति॑श्च॒ मे॒
ऽष्टा॑वि॒ंशति॑श्च॒ मे॒ द्वात्रि॑ंशच्च॒ मे॒ षट्त्रि॑ंशच्च॒ मे॒
चत्वारि॑ंशच्च॒ मे॒ चतु॑श्चत्वारि॑ंशच्च॒ मे॒ ऽष्टाच॑त्वारि॑ंशच्च॒ मे॒
वाज॑श्च॒ प्रस॑वश्चापि॒जश्च॒ क्रतु॑श्च॒ सुव॑श्च॒ मूर्द्धा॑ च॒ व्यश्नि॑जयश्चा-()-
न्त्याय॑नश्चान्त्यश्च॒ भौव॑नश्च॒ भुव॑नश्चाधि॒पति॑श्च ॥ 20

TS 4.7.11.2 - Padam

मे॒ । च॒त॒स्रः॑ । च॒ । मे॒ । अ॒ष्टौ॑ । च॒ । मे॒ । द्वा॒द॒श॑ । च॒ । मे॒ ।
षो॒ड॒श॑ । च॒ । मे॒ । वि॒ं॒श॒तिः॑ । च॒ । मे॒ । च॒तुर्विं॑शतिरिति
च॒तुः॑ – वि॒ं॒श॒तिः॑ । च॒ । मे॒ । अ॒ष्टा॒विं॑शतिरित्यष्टा – वि॒ं॒श॒तिः॑ ।
च॒ । मे॒ । द्वा॒त्रिं॑शत् । च॒ । मे॒ । षट्त्रिं॑शदिति षट् – त्रिं॒श॒त् ।
च॒ । मे॒ । च॒त्वा॒रिं॑शत् । च॒ । मे॒ ।
च॒तुश्च॒त्वा॒रिं॑शदिति च॒तुः॑ – च॒त्वा॒रिं॑शत् । च॒ । मे॒ ।
अ॒ष्टा॒च॒त्वा॒रिं॑शदित्यष्टा – च॒त्वा॒रिं॑शत् । च॒ । मे॒ । वा॒जः॑ । च॒ ।
प्र॒स॒व॒ इति॑ प्र – स॒वः॑ । च॒ । अ॒पि॒ज॒ इत्य॑पि-जः । च॒ । क्र॒तुः॑ । च॒ ।
सु॒वः॑ । च॒ । मू॒र्द्धा॑ । च॒ । व्य॒श्नि॒ज॒य॒ इति॑ वि – अ॒श्नि॒ज॒यः॑ () । च॒ ।
आ॒न्त्या॒य॒नः॑ । च॒ । अ॒न्त्यः॑ । च॒ । भौ॒व॒नः॑ । च॒ । भु॒व॒नः॑ । च॒ ।
अ॒धि॒प॒ति॒रित्य॑धि – प॒तिः॑ । च॒ ॥ 20 (61)
(त्रय॑स्त्रिं॒शच्च॑ – व्य॒श्नि॒ज॒य॒ – ए॒का॒द॒श॒ च॒) (A11)

TS 4.7.12.1

वा॒जो नः स॒प्त प्र॒दिश॑श्चत॒स्रो वा॒ परा॑वतः ।
वा॒जो नो॒ विश्वे॑र्दे॒वैर् धन॑साताविहावतु ॥
विश्वे॑ अ॒द्य म॒रुतो॒ विश्व॑ ऊ॒ती विश्वे॑ भवन्त्व॒ग्नयः॑ समि॒द्धाः ।
विश्वे॑ नो दे॒वा अव॑साऽऽ गमन्तु विश्वमस्तु द्रवि॑णं वा॒जो अ॒स्मे ॥
वा॒जस्य॑ प्रस॒वं दे॒वा रथै॑र्या॒ता हिर॑ण्ययैः ।
अ॒ग्निरिन्द्रो॒ बृह॒स्पति॑र्मरुतः सोमपीतये ॥
वा॒जेवा॒जे ऽवत॑ वाजिनो नो धनेषु – [] 21

TS 4.7.12.1 - Padam

वा॒जः । नः । स॒प्त । प्र॒दिश॑ इति प्र – दि॒शः । चत॑स्रः । वा ।
परा॑वत इति परा – वतः ॥ वा॒जः । नः । विश्वे॑ः । दे॒वैः ।
धन॑साताविति धन – सा॒तौ । इ॒ह । अव॑तु ॥ विश्वे॑ । अ॒द्य । म॒रुतः॑ ।
विश्वे॑ । ऊ॒ती । विश्वे॑ । भव॑न्तु । अ॒ग्नयः॑ । समि॒द्धा इति॑ सं – इ॒द्धाः ॥
विश्वे॑ । नः । दे॒वाः । अव॑सा । एति॑ । गम॑न्तु । विश्व॑म् । अ॒स्तु ।
द्रवि॑णम् । वा॒जः । अ॒स्मे इति॑ ॥ वा॒जस्य॑ । प्रस॒वमिति॑ प्र – स॒वम् ।

दे॒वाः । र॒थैः । या॒त । हि॒र॒ण्य॒यैः ॥ अ॒ग्निः । इ॒न्द्रः । बृ॒ह॒स्प॒तिः ।
म॒रु॒तः । सोम॑पी॒तय॑ इति॒ सोम॑ – पी॒तये॑ ॥ वा॒जे॒वा॒ज इति॑
वा॒जे – वा॒जे । अ॒व॒त । वा॒जि॒नः । नः । ध॒नेषु॑ । 21 (50)

TS 4.7.12.2

वि॒प्रा अ॒मृ॒ता ऋ॒त॒ज्ञाः ।

अ॒स्य म॒ध्वः पि॒ब॒त मा॒दय॑ध्वं॒ तृ॒प्ता या॒त प॒थि॒भिर्दे॒व॒यानैः॑ ॥
वा॒जः पु॒र॒स्ता॒दु॒त म॒द॒ध्य॒तो नो॒ वा॒जो दे॒वा ऋ॒तु॒भिः क॒ल्प॒या॒ति ।
वा॒ज॒स्य हि प्र॒स॒वो न॒न॒मी॒ति वि॒श्वा आ॒शा वा॒ज॒प॒तिर्भ॒वे॒यं ॥
प॒यः पृ॒थि॒व्यां प॒य ओष॑धीषु॒ पयो॑ दि॒व्य॒न्त॒रि॒क्षे प॒यो धां॑ ।
प॒य॒स्व॒तीः प्र॒दि॒शः स॒न्तु म॒ह्यं ॥
सं मा॑ सृ॒जामि॑ प॒य॒सा घृ॒तेन॑ सं मा॑ सृ॒जाम्य॒प – [] 22

TS 4.7.12.2 - Padam

वि॒प्राः । अ॒मृ॒ताः । ऋ॒त॒ज्ञा इत्यृ॑त – ज्ञाः ॥ अ॒स्य । म॒ध्वः । पि॒ब॒त ।
मा॒दय॑ध्वम् । तृ॒प्ताः । या॒त । प॒थि॒भिरि॑ति॒ प॒थि – भिः । दे॒व॒यानै॑रिति॒
दे॒व – यानैः॑ ॥ वा॒जः । पु॒र॒स्ता॒त् । उ॒त । म॒द॒ध्य॒तः । नः । वा॒जः ।

पद पाठे (वाक्य सहित) – चतुर्थकाण्डे – सप्तमः प्रश्नः

दे॒वान् । ऋ॒तुभि॒रित्यृ॒तु – भिः । क॒ल्प॒या॒ति ॥ वा॒ज॒स्य । हि ।
प्र॒स॒व इति॑ प्र – स॒वः । न॒न्नमी॑ति । वि॒श्वाः ॥ आ॒शाः ॥ वा॒ज॒प॒ति॒रिति॑
वा॒ज – प॒तिः । भ॒वे॒यम् ॥ प॒यः । पृ॒थि॒व्याम् । प॒यः । ओष॑धीषु ।
प॒यः । दि॒वि । अ॒न्त॒रि॒क्षे । प॒यः । धा॒म् ॥ प॒य॒स्व॒तीः ।
प्र॒दि॒श इति॑ प्र – दि॒शः । स॒न्तु । म॒ह्यम् ॥ स॒मि॒ति । मा । सृ॒जा॒मि ।
प॒य॒सा । घृ॒तेन॑ । स॒मि॒ति । मा । सृ॒जा॒मि । अ॒पः । 22 (50)

TS 4.7.12.3

ओष॑धीभिः ।

सोऽहं॑ वा॒जꣳ स॒ने॒य॒म॒ग्ने ॥

न॒क्तोषा॑सा स॒म॒न॒सा वि॒रूपे॑ धा॒प॒ये॒ते शि॒शु॒मे॒कꣳ स॒मी॒ची ।

द्या॒वा क्षा॒मा रु॒क्मो॑ अ॒न्त॒र्वि॒ भा॒ति दे॒वा अ॒ग्निं॑ धा॒र॒यन् द्र॒वि॒णो॒दाः ॥

स॒मु॒द्रोऽसि॑ न॒भ॒स्वा॒ना॒र्द्र॒दा॒नुः शं॒भूर्म॒योभू॒रभि॑ मा वा॒हि स्वा॒हा

मा॒रु॒तोऽसि॑ म॒रु॒तां ग॒णः शं॒भूर्म॒योभू॒रभि॑ मा वा॒हि स्वा॒हा

ऽव॒स्यु॒रसि॑ दु॒व॒स्वा॒ज्छं॒भूर्म॒योभू॒रभि॑ मा () वा॒हि स्वा॒हा ॥ 23

TS 4.7.12.3 - Padam

ओ॑ष॒धीभि॑रित्यो॒षधि॑ – भिः॑ ॥ सः॑ । अ॒हम् । वा॒जम् । स॒ने॒यम् ।
अ॒ग्ने ॥ न॒क्तो॒षासा॑ । स॒म॒न॒सेति॑ स॒-म॒न॒सा । वि॒रूपे॑ इति वि॒-रूपे॑ ।
धा॒पये॑ते इति । शि॒शुम् । ए॒कम् । स॒मी॒ची इति॑ ॥ द्या॒वा । क्षा॒म ।
रु॒क्मः । अ॒न्तः । वी॒ति । भा॒ति । दे॒वाः । अ॒ग्निम् । धा॒रय॑न् ।
द्र॒वि॒णो॒दा इति॑ द्र॒विणः॑ – दाः॑ ॥ स॒मु॒द्रः । अ॒सि । न॒भ॒स्वान् ।
आ॒र्द्र॒दा॒नु॒रित्या॑र्द्र॒-दा॒नुः । शं॒भूरि॑ति शं॒-भूः॑ । म॒यो॒भूरि॑ति मयः॒-भूः॑ ।
अ॒भी॒ति । मा॒ । वा॒हि । स्वा॒हा । मा॒रु॒तः । अ॒सि । म॒रु॒ताम् । ग॒णः ।
शं॒भूरि॑ति शं॒ – भूः॑ । म॒यो॒भूरि॑ति मयः॒ – भूः॑ । अ॒भी॒ति । मा॒ ।
वा॒हि । स्वा॒हा । अ॒व॒स्युः । अ॒सि । दु॒व॒स्वान् । शं॒भूरि॑ति
शं॒ – भूः॑ । म॒यो॒भूरि॑ति मयः॒ – भूः॑ । अ॒भी॒ति । मा॒ () । वा॒हि ।
॥
स्वा॒हा ॥ 23 (52)

(ध॒ने॑ – ष्व॒पो – दु॒व॒स्वा॒ज्छं॒भूर्म॒यो॒भूर॒भि मा॒ – द्वे च॑) (A12)

TS 4.7.13.1

अ॒ग्निं॑ यु॒न॒ज्मि॑ श॒व॒सा॑ घृ॒तेन॑ दि॒व्य॑ सु॒पर्णं॑ व॒य॒सा॑ बृ॒हन्तं॑ ।
तेन॑ व॒यं प॑तेम ब्र॒ध्नस्य॑ वि॒ष्टप॑ सु॒वो रु॒हाणा॑ अधि॒ नाकं॑ उ॒त्तमे॑ ॥
इ॒मौ ते॑ प॒क्षाव॒जरौ॑ प॒त॒त्रि॒णो या॒भ्या र॒क्षा स्य॑प॒ह स्य॑ग्ने ।
ता॒भ्यां प॑तेम सु॒कृता॑मु॒ लोकं॑ य॒त्र ऋ॒षयः॑ प्रथ॒मजा॑ ये पु॒राणाः॑ ॥
चि॒द॒सि॑ स॒मु॒द्रयो॑नि-रि॒न्दु॒र्दक्षः॑ श्ये॒न ऋ॒तावा॑ ॥
हि॒र॒ण्य॒पक्षः॑ श॒कु॒नो भु॑र॒ण्युर् म॒हान्त् स॒धस्थे॑ ध्रु॒व - [] 24

TS 4.7.13.1 - Padam

अ॒ग्नि॒म् । यु॒न॒ज्मि॑ । श॒व॒सा॑ । घृ॒तेन॑ । दि॒व्य॒म् । सु॒पर्ण॑मि॒ति॑
सु - पर्ण॑म् । व॒य॒सा॑ । बृ॒हन्त॑म् ॥ तेन॑ । व॒य॒म् । प॑तेम । ब्र॒ध्नस्य॑ ।
वि॒ष्टप॑म् । सु॒वः॑ । रु॒हाणाः॑ । अधि॑ति । ना॒के॑ । उ॒त्त॒म इत्यु॑त् - त॒मे ॥
इ॒मौ । ते॑ । प॒क्षौ । अ॒जरौ॑ । प॒त॒त्रि॒णः॑ । या॒भ्याम् । र॒क्षा॑सि ।
अ॒प॒ह॑सीत्य॒प - ह॑सि । अ॒ग्ने ॥ ता॒भ्याम् । प॑तेम ।
सु॒कृता॑मि॒ति॑ सु - कृ॒ताम् । उ॒ । लो॒कम् । य॒त्र । ऋ॒षयः॑ ।
प्रथ॒मजा॑ इति॑ प्रथ॒म - जाः॑ । ये । पु॒राणाः॑ ॥ चि॒त् । अ॒सि॒ ।

समु॒द्रयो॑नि॒रिति॑ समु॒द्र – यो॒निः । इ॒न्दुः । दक्षः । इ॒येनः ।

ऋ॒तावे॑त्यृ॒त – वा ॥ हि॒रण्य॑पक्ष॒ इति॑ हि॒रण्य – प॒क्षः । श॒कुनः ।

भु॒रण्युः । म॒हान् । स॒धस्थ॑ इति॑ स॒ध – स्थे । ध्रु॒वः । 24 (50)

TS 4.7.13.2

आ नि॒षत्तः ॥

नम॑स्ते अस्तु॒ मा मा हि॒॒सीर्वि॑श्वस्य मू॒र्ध्नन्ना॑धि तिष्ठसि श्रि॒तः ।

समु॒द्रे ते हृ॒दय॑-मन्तरा॒युर् द्या॑वापृथि॒वी भुव॑नेष्वर्पि॒ते ॥

उ॒द्नो द॑त्तोद॒धिं भि॑न्त दि॒वः प॒र्जन्या॑दन्तरि॒क्षात् पृथि॑व्यास्ततो॒ नो
वृ॒ष्ट्या ऽव॑त ।

दि॒वो मू॒र्ध्ना ऽसि॑ पृथि॒व्या नाभि॑-रू॒र्गपा॑-मोष॒धीनां॑ ।

वि॒श्वायुः॑ शर्म॒ सप्र॑था नम॒स्पथे॑ ॥

येन॑र्षयस्तपसा स॒त्र – [] 25

TS 4.7.13.2 - Padam

एति॑ । नि॒षत्त॒ इति॑ नि – स॒त्तः ॥ नमः॑ । ते । अस्तु॒ । मा । मा ।

हि॒॒सीः । वि॒श्वस्य॑ । मू॒र्ध्नन् । अधी॑ति । तिष्ठसि॒ । श्रि॒तः ॥ समु॒द्रे ।

पद पाठे (वाक्य सहित) – चतुर्थकाण्डे – सप्तमः प्रश्नः

ते॑ । हृ॒दय॑म् । अ॒न्तः । आ॒युः । द्या॒वापृ॑थि॒वी इति॑ द्या॒वा – पृ॒थि॒वी ।
भु॒वने॑षु । अ॒र्पि॑ते इति॑ ॥ उ॒द्नः । द॒त्त । उ॒दधि॑मित्यु॒द-धि॑म् । भि॒न्त ।
दि॒वः । प॒र्जन्या॑त् । अ॒न्तरि॑क्षात् । पृ॒थि॒व्याः । ततः॑ । नः॑ । वृ॒ष्ट्या॑ ।
अ॒वत॑ ॥ दि॒वः । मू॒र्द्धा । अ॒सि । पृ॒थि॒व्याः । ना॒भिः । ऊ॒र्क् । अ॒पाम् ।
ओष॑धी॒नाम् ॥ वि॒श्वायु॑रिति॑ वि॒श्व – आ॒युः । श॒र्म । स॒प्र॒था इति॑
स – प्र॒थाः । नमः॑ । प॒थे ॥ येन॑ । ऋ॒षयः॑ । तप॑सा । स॒त्रम् । 25 (50)

TS 4.7.13.3

मा॒सते॑न्धा॒ना अ॒ग्निं सु॒वरा॑भरन्तः ।
तस्मि॑न्न॒हं नि॑ द॒धे ना॑के अ॒ग्निमे॒तं य॑माहु॒र्मन॑व स्ती॒र्णब॑र्हिषं ॥
तं प॒त्नीभि॑रनु॒ गच्छे॑म दे॒वाः पु॒त्रैर्भ्रा॑तृभि॒रुत॑ वा हि॒रण्यैः॑ ।
नाकं॑ गृ॒ह्णा॒नाः सु॒कृ॒तस्य॑ लो॒के तृ॒तीये॑ पृ॒ष्ठे अधि॑ रो॒चने॑ दि॒वः ॥
आ वा॒चो म॑द्ध्य-म॒रुह॑द्-भु॒रण्यु॑रय-म॒ग्निः स॒त्पति॑श्चे॒कितानः॑ ।
पृ॒ष्ठे पृ॒थि॒व्या नि॑हि॒तो द॑विद्यु॒तद॑ध॒स्पदं॑ कृ॒णुते॑ – [] 26

TS 4.7.13.3 - Padam

आ॒स॒त । इ॒न्धा॒नाः । अ॒ग्नि॒म् । सु॒वः । आ॒भ॒र॒न्त॒ इत्या॑ – भ॒र॒न्तः ॥
तस्मि॑न् । अ॒ह॒म् । नी॒ति । द॒धे । ना॒के॑ । अ॒ग्नि॒म् । ए॒त॒म् । य॒म् ।
आ॒हुः । म॒न॒वः । स्ती॒र्ण॒ब॒र्हि॒ष॒मि॒ति॑ स्ती॒र्ण – ब॒र्हि॒ष॒म् ॥ त॒म् ।
प॒त्नी॒भिः । अ॒न्वि॒ति॑ । ग॒च्छे॒म । दे॒वाः । पु॒त्रैः । भ्रा॒तृ॒भि॒रि॒ति॑
भ्रा॒तृ – भिः॑ । उ॒त । वा । हि॒र॒ण्यैः ॥ ना॒क॒म् । गृ॒ह्णा॒नाः ।
सु॒कृ॒त॒स्ये॒ति॑ सु – कृ॒त॒स्य॑ । लो॒के । तृ॒ती॒यैः । पृ॒ष्ठे । अधी॑ति ।
रो॒च॒ने । दि॒वः ॥ ए॒ति॑ । वा॒चः । म॒द्ध्य॒म् । अ॒रु॒ह॒त् । भु॒र॒ण्युः ।
अ॒य॒म् । अ॒ग्निः । स॒त्प॒ति॒रि॒ति॑ स॒त् – प॒तिः । चे॒कि॒तानः ॥
पृ॒ष्ठे । पृ॒थि॒व्याः । नि॒हि॒त॒ इति॑ नि – हि॒तः । द॒वि॒द्यु॒त॒त् ।
अ॒ध॒स्प॒द॒मि॒त्य॒धः – प॒द॒म् । कृ॒णु॒ते । 26 (50)

TS 4.7.13.4

ये पृ॒त॒न्य॒वः ॥
अ॒य॒म॒ग्नि॒र्वी॒र॒त॒मो॑ व॒यो॒धाः स॒ह॒स्रि॒यो दी॒प्य॒ता॒म॒प्र॒यु॒च्छ॒न् ।
वि॒भ्रा॒ज॒मा॒नः॑ स॒रि॒र॒स्य॒ म॒द्ध्य॒ उप॒ प्र॒ या॒त दि॒व्या॒नि॒ धा॒म ॥

सं प्र च्यवद्ध्वमनु सं प्र याताग्ने पथो देवयानान् कृणुद्ध्वं ।
अस्मिन्त् सधस्थे अद्ध्युत्तरस्मिन् विश्वे देवा यजमानश्च सीदत ॥
येना सहस्रं वहसि येनाग्ने सर्ववेदसं ।

तेनेमं यज्ञं नो वह देवयानो य – [] 27

TS 4.7.13.4 - Padam

ये । पृतन्यवः ॥ अयम् । अग्निः । वीरतम इति वीर – तमः ।
वयोधा इति वयः – धाः । सहस्रियः । दीप्यताम् ।
अप्रयुच्छन्नित्यप्र – युच्छन् ॥ विभ्राजमान इति वि – भ्राजमानः ।
सरिरस्य । मद्ध्यै । उप । प्रेति । यात । दिव्यानि । धाम ॥ सम् ।
प्रेति । च्यवद्ध्वम् । अन्विति । सम् । प्रेति । यात । अग्ने । पथः ।
देवयानानिति देव – यानान् । कृणुद्ध्वम् ॥ अस्मिन् । सधस्थ इति
सध – स्थे । अधीति । उत्तरस्मिन्नित्युत्तरस्मिन् । विश्वे । देवाः ।
यजमानः । च । सीदत ॥ येन । सहस्रम् । वहसि । येन । अग्ने ।
सर्ववेदसमिति सर्व – वेदसम् ॥ तेन । इमम् । यज्ञम् । नः । वह ।
देवयान इति देव – यानः । यः । 27 (50)

TS 4.7.13.5

उत्तमः ॥

उद्-बुद्ध्यस्वाग्ने॑ प्रति॑ जागृ॒ह्येन-मि॒ष्टापूर्ते॑ सꣳ सृ॒जे॒थामयं॑ च॑ ।

पुनः॑ कृ॒ण्वꣳस्त्वा पि॒तरं॑ यु॒वान्-मन्वा॒ताꣳसीत्॑ त्वयि॑ तन्तु॒मेतं॑ ॥

अयं॑ ते॒ योनि॑र् ऋ॒त्वियो॑ यतो॑ जा॒तो अ॒रोच॑थाः ।

तं जा॒नन्न॒ग्न आ॒ रोहा॒था नो॑ वर्द्ध॒या रयि॑ ॥ 28

TS 4.7.13.5 - Padam

उत्त॒म इत्यु॑त्-तमः॑ ॥ उदि॑ति । बु॒द्ध्यस्व॑ । अ॒ग्ने । प्र॒तीति॑ । जा॒गृहि॑ ।

ए॒नम् । इ॒ष्टापूर्ते॑ इती॒ष्टा - पूर्ते॑ । समि॑ति । सृ॒जे॒थाम् । अ॒यम् । च॑ ॥

पुनः॑ । कृ॒ण्वन् । त्वा । पि॒तरम् । यु॒वानम् ।

अ॒न्वाताꣳसी॑दित्यनु॒-आताꣳसीत्॑ । त्वयि॑ । तन्तु॒म् । ए॒तम् ॥ अ॒यम् ।

ते । योनिः॑ । ऋ॒त्वियः॑ । यतः॑ । जा॒तः । अ॒रोच॑थाः ॥ तम् । जा॒नन् ।

अ॒ग्ने । ए॒ति । रो॒ह । अथ॑ । नः॑ । वर्द्ध॒य । रयि॑म् ॥ 28 (37)

(ध्रुवः - सत्रं - कृणुते - यः - सप्तत्रिंशच्च) (A13)

TS 4.7.14.1

म॒मा॒ग्ने॒ व॒र्चो॑ वि॒ह॒वे॒ष्व॒स्तु॑ व॒यं॑ त्वे॒न्धा॒ना॑ स्त॒नु॒वं॑ पु॒षे॒म॑ ।
म॒ह्यं॑ न॒म॒न्तां॑ प्र॒दि॒श॒श्च॒त॒स्र॒ स्त्व॒या॑ ऽद॒ध्य॒क्षे॒ण॒ पृ॒त॒ना॑ ज॒ये॒म॑ ॥
म॒म॑ दे॒वा वि॒ह॒वे॑ स॒न्तु॑ स॒र्व॒ इन्द्रा॑व॒न्तो॑ म॒रु॒तो॑ वि॒ष्णु॑र॒ग्निः॑ ।
म॒मा॒न्तरि॑क्ष-मु॒रु गो॒प॒म॒स्तु॑ म॒ह्यं॑ वा॒तः॑ प॒व॒तां॑ का॒मे॑ अ॒स्मिन्॑ ॥
म॒यि॑ दे॒वा द्र॒वि॒ण-मा॑ य॒ज॒न्तां॑ म॒य्या॒शी-र॑स्तु॒ मयि॑ दे॒व॒हू॒तिः॑ ।
दै॒व्या॒ हो॒ता॒रा॑ व॒नि॒ष॒न्त॒ - [] 29

TS 4.7.14.1 - Padam

म॒म॑ । अ॒ग्ने॒ । व॒र्चः॑ । वि॒ह॒वे॒ष्वि॒ति॑ वि - ह॒वे॒षु॑ । अ॒स्तु॑ । व॒यम्॑ ।
त्वा॒ । इ॒न्धा॒नाः॑ । त॒नु॒वम्॑ । पु॒षे॒म॑ ॥ म॒ह्यम्॑ । न॒म॒न्ता॒म् । प्र॒दि॒श॒ इति॑
प्र - दि॒शः॑ । च॒त॒स्रः॑ । त्व॒या॑ । अ॒द॒ध्य॒क्षे॒णे॒त्य॒धि॑ - अ॒क्षे॒ण॒ । पृ॒त॒नाः॑ ।
ज॒ये॒म॑ ॥ म॒म॑ । दे॒वाः॑ । वि॒ह॒व॒ इति॑ वि - ह॒वे॑ । स॒न्तु॑ । स॒र्वे॑ ।
इन्द्रा॑व॒न्त॒ इतीन्द्र॑ - व॒न्तः॑ । म॒रु॒तः॑ । वि॒ष्णुः॑ । अ॒ग्निः॑ ॥ म॒म॑ ।
अ॒न्तरि॑क्षम् । उ॒रु॑ । गो॒प॒म् । अ॒स्तु॑ । म॒ह्यम्॑ । वा॒तः॑ । प॒व॒ता॒म् ।
का॒मे॑ । अ॒स्मिन्॑ ॥ म॒यि॑ । दे॒वाः॑ । द्र॒वि॒णम्॑ । ए॒ति॑ । य॒ज॒न्ता॒म् । म॒यि॑ ।

आ॒शी॒रित्या॑ – शीः । अ॒स्तु । मयि॑ । दे॒व॒हू॒तिरि॒ति दे॒व – हू॒तिः ॥

दै॒व्या॑ । हो॒तारा॑ । व॒नि॒ष॒न्त । 29 (50)

TS 4.7.14.2

पूर्वे॑ ऽरि॒ष्टाः स्याम॑ त॒नुवा॑ सु॒वीराः॑ ॥

म॒ह्यं यँ॑जन्तु॒ मम॑ या॒नि ह॒व्या ऽकू॑तिः स॒त्या म॒न॒सो मे॑ अस्तु ।

ए॒नो मा॑ निगां॑ क॒त॒म॒च्च॒नाहं॑ विश्वे॑ दे॒वा॒सो अ॒धि वो॑च॒ता मे॑ ॥

दे॒वीः ष॒डु॒र्वी-रु॒रु णः॑ कृ॒णो॒त विश्वे॑ दे॒वा॒स इ॒ह वी॑र॒य॒द्ध्वं ।

मा हा॑स्महि प्र॒जया॑ मा त॒नूभि॒र्मा र॑धाम द्वि॒षते॑ सोम॒ राज॑न् ॥

अ॒ग्नि॒र्म॒न्युं प्र॑ति॒नु॒दन् पु॒रस्ता॑- [] 30

TS 4.7.14.2 - Padam

पूर्वे॑ । अ॒रि॒ष्टाः । स्या॒म । त॒नुवा॑ । सु॒वीरा॑ इति॑ सु – वी॒राः ॥ म॒ह्यम् ।

य॒ज॒न्तु । म॒म । या॒नि । ह॒व्या । आ॒कू॒तिरि॒त्या – कू॒तिः । स॒त्या ।

म॒न॒सः । मे॑ । अ॒स्तु ॥ ए॒नः । मा॑ । नी॒ति । गा॒म् । क॒त॒म॒त् । च॒न ।

अ॒हम् । विश्वे॑ । दे॒वा॒सः । अ॒धी॒ति । वो॒च॒त । मे॑ ॥ दे॒वीः । ष॒डु॒र्वीरि॑ति

षट् – उ॒र्वीः । उ॒रु । नः॑ । कृ॒णो॒त । विश्वे॑ । दे॒वा॒सः । इ॒ह ।

पद पाठे (वाक्य सहित) – चतुर्थकाण्डे – सप्तमः प्रश्नः

वी॒र॒य॒द्ध्व॒म् ॥ मा । हा॒स्म॒हि । प्र॒ज॒ये॒ति॒ प्र – ज॒या । मा । त॒नू॒भिः ।

मा । र॒धा॒म । द्वि॒ष॒ते । सो॒म । रा॒ज॒न् ॥ अ॒ग्निः । म॒न्यु॒म् ।

प्र॒ति॒नु॒द॒न्निति॑ प्र॒ति – नु॒द॒न् । पु॒र॒स्तात् ॥ 30 (50)

TS 4.7.14.3

द॒द॒ब्धो॑ गो॒पाः परि॑ पा॒हि न॒स्त्वं ।

प्र॒त्य॒ज्चो॑ य॒न्तु नि॒गु॒तः पु॒न॒स्ते ऽमै॑षां चि॒त्तं प्र॒बु॒धा वि॑ नेशत् ॥

धा॒ता धा॒तृ॒णां भु॒व॒न॒स्य॒ य॒स्पति॑र् दे॒व॒ः स॒वि॒ता॒र-म॒भि॒मा॒ति॒षा॒हं ॥

इ॒मं यँ॒ज्ञ म॒श्वि॒नो॒भा बृ॒ह॒स्पति॑र् दे॒वाः पा॑न्तु यज॒मानं॑ न्य॒र्थात् ॥

उ॒रु॒व्य॒चा नो॑ म॒हि॒षः श॒र्म यँ॒सद॒स्मिन् ह॒वे पु॒रु॒हू॒तः पु॒रु॒क्षु ।

स नः॑ प्र॒जा॒यै ह॒र्यश्च॑ मृ॒ड॒ये॒न्द्र मा – [] 31

TS 4.7.14.3 - Padam

अ॒द॒ब्धः । गो॒पा इति॑ गो – पाः । प॒री॒ति । पा॒हि । नः । त्व॒म् ॥

प्र॒त्य॒ज्चः । य॒न्तु । नि॒गु॒त इति॑ नि-गु॒तः । पु॒नः । ते । अ॒मा ।

ए॒षाम् । चि॒त्तम् । प्र॒बु॒धेति॑ प्र – बु॒धा । वी॒ति । ने॒शत् ॥ धा॒ता ।

धा॒तृ॒णाम् । भु॒व॒न॒स्य । यः । प॒तिः । दे॒वम् । स॒वि॒ता॒रम् ॥

अ॒भि॒मा॒ति॒षा॒ह॒मि॒त्य॒भि॒मा॒ति॒-सा॒हम् ॥ इ॒मम् । य॒ज्ञम् । अ॒श्वि॒ना॒ । उ॒भा ।
बृ॒ह॒स्प॒तिः । दे॒वाः । पा॒न्तु । य॒ज॒मा॒नम् । न्य॒र्था॒दि॒ति॒ नि॒- अ॒र्थात् ॥
उ॒रु॒व्य॒चा इ॒त्यु॒रु॒-व्य॒चाः । नः । म॒हि॒षः । श॒र्म । य॒-स॒त् । अ॒स्मिन् ।
ह॒वे । पु॒रु॒हू॒त इति॑ पु॒रु - हू॒तः । पु॒रु॒क्षु ॥ सः । नः । प्र॒जा॒य इति॑
प्र - जा॒यै । ह॒र्य॒श्चेति॑ ह॒रि - अ॒श्व । मृ॒ड॒य । इ॒न्द्र । मा । 31 (50)

TS 4.7.14.4

नो॑ री॒रि॒षो मा॑ प॒रा दाः ॥
ये नः॑ स॒प॒न्ना अप॑ ते भ॒व॒न्त्वि॒न्द्रा॒ग्नि॒भ्या॒-मव॑ बा॒धाम॒हे तान् ।
व॒स॒वो रु॒द्रा आ॑दि॒त्या उ॒परि॒स्पृ॒शं मो॒ग्रं चे॒त्ता॒र-म॒धि रा॒ज-म॒क्रन् ॥
अ॒र्वाञ्च॒ मि॒न्द्र॒म॒मु॒तो ह॒वाम॒हे यो गो॒जिद्-ध॒न॒जि॒दश्च॒जिद्-यः ।
इ॒म॒न्नो य॒ज्ञं वि॒ह॒वे जु॒ष॒स्वा॒स्य कु॒र्मो ह॒रि॒वो मे॒दि॒नं त्वा ॥ 32

TS 4.7.14.4 - Padam

नः । री॒रि॒षः । मा । प॒रेति॑ । दाः ॥ ये । नः । स॒प॒न्नाः । अ॒पेति॑ । ते ।
भ॒व॒न्तु । इ॒न्द्रा॒ग्नि॒भ्या॒मि॒ती॒न्द्रा॒ग्नि॒-भ्या॒म् । अ॒वेति॑ । बा॒धाम॒हे । तान् ॥
व॒स॒वः । रु॒द्राः । आ॒दि॒त्याः । उ॒परि॒स्पृ॒श॒मि॒त्यु॒परि॑ - स्पृ॒शम् । मा ।

पद पाठे (वाक्य सहित) – चतुर्थकाण्डे – सप्तमः प्रश्नः

उ॒ग्रम् । चे॒त्ता॒रम् । अ॒धि॒रा॒ज॒मि॒त्य॒धि॒ – रा॒जम् । अ॒क्र॒न् ॥ अ॒र्वा॒ञ्च॒म् ।
इ॒न्द्रम् । अ॒मु॒तः । ह॒वा॒म॒हे । यः । गो॒जि॒दि॒ति॒ गो – जि॒त् । ध॒न॒जि॒दि॒ति॒
ध॒न – जि॒त् । अ॒श्व॒जि॒दि॒त्य॒श्व – जि॒त् । यः ॥ इ॒मम् । नः । य॒ज्ञम् ।
वि॒ह॒व इति॑ वि – ह॒वे । जु॒ष॒स्व । अ॒स्य । कु॒र्मः ।
ह॒रि॒व इति॑ ह॒रि – वः । मे॒दि॒नम् । त्वा ॥ 32 (43)

(व॒नि॒ष॒न्त – पु॒र॒स्ता॒न् – मा – त्रि॒च॒त्वा॒रि॒ञ्च॒) (A14)

TS 4.7.15.1

अ॒ग्ने॒र्म॒न्वे प्र॒थ॒म॒स्य प्र॒चे॒त॒सो यं पा॒ञ्च॒ज॒न्यं ब॒ह॒वः स॒मि॒न्ध॒ते ।
वि॒श्व॒स्यां वि॒शि प्र॒वि॒वि॒शि॒वा॒ञ्स॒मी॒म॒हे स नो॑ मु॒ञ्च॒त्वञ् ह॒सः ॥
य॒स्ये॒दं प्रा॒ण॒न्नि॒मि॒षद् यदे॒ज॒ति॒ यस्य॑ जा॒तं ज॒न॒मा॒नं च॒ के॒वलं ।
स्तौ॒म्य॒ग्निं ना॒थि॒तो जो॒ह॒वी॒मि स नो॑ मु॒ञ्च॒त्वञ् ह॒सः ॥
इ॒न्द्र॒स्य म॒न्ये प्र॒थ॒म॒स्य प्र॒चे॒त॒सो वृ॒त्र॒घ्नः स्तो॒मा उप॒ मा–मु॒पा॒गुः ।
यो दा॒शु॒षः सु॒कृ॒तो ह॒व॒मु॒प ग॒न्ता – [] 33

TS 4.7.15.1 - Padam

अ॒ग्नेः । म॒न्वे । प्र॒थ॒म॒स्य॑ । प्र॒चे॒त॒स॒ इति॑ प्र – चे॒त॒सः॑ । यम् ।
पा॒ञ्च॒ज॒न्य॒मि॒ति॑ पा॒ञ्च – ज॒न्य॒म् । ब॒हवः॑ ।
स॒मि॒न्ध॒त॒ इति॑ स॒म् – इ॒न्ध॒ते ॥ वि॒श्व॒स्याम् । वि॒शि ।
प्र॒वि॒वि॒शि॒वा॒स॒मि॒ति॑ प्र – वि॒वि॒शि॒वा॒स॒म् । ई॒म॒हे । सः । नः ।
मु॒ञ्च॒तु । अ॒ह॒सः ॥ य॒स्य॑ । इ॒द॒म् । प्रा॒ण॒दि॒ति॑ प्र – अ॒न॒त् ।
नि॒मि॒ष॒दि॒ति॑ नि – मि॒ष॒त् । य॒त् । ए॒ज॒ति॑ । य॒स्य॑ । जा॒त॒म् ।
ज॒न॒मा॒न॒म् । च॒ । के॒व॒ल॒म् ॥ स्तो॒मि॑ । अ॒ग्नि॒म् । ना॒थि॒तः । जो॒ह॒वी॒मि॑ ।
सः । नः । मु॒ञ्च॒तु । अ॒ह॒सः ॥ इ॒न्द्र॒स्य॑ । म॒न्ये॑ । प्र॒थ॒म॒स्य॑ ।
प्र॒चे॒त॒स॒ इति॑ प्र – चे॒त॒सः॑ । वृ॒त्र॒घ्न॒ इति॑ वृ॒त्र॒घ्नः॑ । स्तो॒माः॑ ।
उ॒पे॒ति॑ । मा॒म् । उ॒पा॒गु॒रि॒त्यु॒प – आ॒गुः ॥ यः । दा॒शु॒षः ।
सु॒कृ॒त॒ इति॑ सु – कृ॒तः॑ । ह॒व॒म् । उ॒पे॒ति॑ । ग॒न्ता॑ । 33 (50)

TS 4.7.15.2

स॒ नो॑ मु॒ञ्च॒त्व॒ह॒सः ॥
यः॑ सं॒ग्रा॒मं॑ न॒य॒ति॑ सँ व॒शी॑ यु॒धे॑ यः पु॒ष्टा॑नि स॒सृ॒ज॒ति॑ त्र॒या॒णि॑ ।

स्तौमीन्द्रं॑ नाथि॒तो जो॒हवीमि॑ स नो मुञ्च॒त्व॒ ह॒सः॑ ॥
मन्वे॑ वां मि॒त्रावरु॑णा तस्य॑ वि॒त्त॒ स॒त्यौज॑सा दृ॒हणा॑ यं नु॒देथे॑ ।
या राजा॑न॒ सर॑थं या॒थ उ॒ग्रा ता नो॑ मुञ्च॒तमा॑गसः ॥
यो वा॒ रथ॑ ऋ॒जुर॑श्मिः स॒त्यध॑र्मा मि॒थुश्चर॑न्त-मु॒पया॑ति दू॒षय॑न् ।
स्तौमि॑ – [] 34

TS 4.7.15.2 - Padam

सः । नः । मुञ्च॒तु । अ॒ह॒सः॑ ॥ यः । सं॒ग्रा॒ममि॑ति सम् – ग्रा॒मम् ।
न॒यति॑ । स॒मि॒ति । व॒शी । यु॒धे । यः । पु॒ष्टा॒नि । स॒सृ॒जती॑ति
सं-सृ॒जति॑ । त्र॒याणि॑ ॥ स्तौमि॑ । इन्द्र॑म् । नाथि॒तः । जो॒हवीमि॑ । सः ।
नः । मुञ्च॒तु । अ॒ह॒सः॑ ॥ मन्वे॑ । वा॒म् । मि॒त्रावरु॑णेति
मि॒त्रा – व॒रुणा॑ । तस्य॑ । वि॒त्तम् । स॒त्यौज॑सेति स॒त्य – ओज॑सा ।
दृ॒हणा॑ । यम् । नु॒देथे॑ इति ॥ या । राजा॑नम् । सर॑थमि॒ति स-र॑थम् ।
या॒थः । उ॒ग्रा । ता । नः । मुञ्च॒तम् । आ॒गसः॑ ॥ यः । वा॒म् । रथः॑ ।
ऋ॒जुर॑श्मि॒रित्यृ॒जु – र॒श्मिः । स॒त्यध॑र्मेति स॒त्य – ध॒र्मा । मि॒थु ।
च॒रन्त॑म् । उ॒पया॑तीत्यु॒प – या॑ति । दू॒षय॑न् ॥ स्तौमि॑ । 34 (50)

TS 4.7.15.3

मि॒त्रावरु॑णा ना॒थितो॑ जो॒हवीमि॑ तौ नो॑ मुञ्चत॒माग॑सः ॥
वा॒योः स॒वितु॑र् वि॒दथानि॑ मन्महे॒ यावा॑त्मन्वद्-बि॒भृतो॑ यौ च॒ रक्ष॑तः ।
यौ विश्व॑स्य परि॒भू ब॑भूवतुस्तौ नो॑ मुञ्चत॒माग॑सः ॥
उप॒ श्रेष्ठा॑ न आ॒शिषो॑ दे॒वयो॒र्द्धमे॑ अस्थिरन् ।
स्तौमि॑ वा॒युꣳ स॒वितारं॑ ना॒थितो॑ जो॒हवीमि॑ तौ नो॑ मुञ्चत॒माग॑सः ॥
रथी॑तमौ रथी॒ना-म॑ह्व ऊ॒तये॑ शु॒भं ग॑मिष्यौ सु॒यमे॑भि॒रश्वैः॑ ।
ययो॑र् -[] 35

TS 4.7.15.3 - Padam

मि॒त्रावरु॑णेति मि॒त्रा - वरु॑णा । ना॒थितः॑ । जो॒हवीमि॑ । तौ । नः॑ ।
मुञ्च॑तम् । आ॒गसः॑ ॥ वा॒योः । स॒वितुः॑ । वि॒दथानि॑ । मन्महे॑ । यौ ।
आ॒त्मन्वदि॑त्यात्मन् - वत् । बि॒भृतः॑ । यौ । च॒ । रक्ष॑तः ॥ यौ ।
विश्व॑स्य । परि॒भू इति॑ परि - भूः । ब॑भूवतुः । तौ । नः॑ । मुञ्च॑तम् ।
आ॒गसः॑ ॥ उपे॑ति । श्रेष्ठाः॑ । नः॑ । आ॒शिष इत्या॑ - शिषः॑ । दे॒वयोः॑ ।
धर्मे॑ । अस्थि॑रन् ॥ स्तौमि॑ । वा॒युम् । स॒वितार॑म् । ना॒थितः॑ ।

जो॒ह॒वी॒मि॒ । तौ॒ । नः॒ । मु॒ञ्च॒त॒म् । आ॒ग॒सः॑ ॥ र॒थी॒त॒मा॒वि॒ति॒
र॒थि॒ – त॒मौ॒ । र॒थी॒ना॒म् । अ॒ह्वे॒ । ऊ॒त॒ये॑ । शु॒भं॑ । ग॒मि॒ष्ठौ॑ ।
सु॒य॒मे॒भि॒रि॒ति॒ सु॒ – य॒मे॒भिः॑ । अ॒श्वैः॑ ॥ य॒योः॑ । 35 (50)

TS 4.7.15.4

वां दे॒वौ दे॒वेष्व॑नि॒शित॒-मो॒ज॒स्तौ नो॑ मु॒ञ्च॒त॒मा॒ग॒सः॑ ॥
यद॒या॒तं॑ व॒ह॒तु॑ꣳ सु॒र्या॒या-स्त्रि॒च॒क्रेण॑ सꣳ स॒द॒मि॒च्छ॒मा॒नौ॑ ।
स्तौ॒मि दे॒वा॒व॒श्वि॒नौ ना॒थि॒तो जो॒ह॒वी॒मि॒ तौ नो॑ मु॒ञ्च॒त॒मा॒ग॒सः॑ ॥
म॒रु॒तां म॒न्वे अ॒धि नो॑ ब्रु॒वन्तु॑ प्रे॒मां वा॒चं वि॒श्वा म॒वन्तु॑ वि॒श्वे॑ ।
आ॒शून् हु॒वे सु॒य॒मा॒नू॒त॒ये ते नो॑ मु॒ञ्च॒न्त्वे॒न॒सः॑ ॥
ति॒ग्म॒मा॒यु॒धं वी॒डि॒तꣳ स॒ह॒स्व॒द् दि॒व्यꣳ श॒र्द्धः॑ – [] 36

TS 4.7.15.4 - Padam

वा॒म् । दे॒वौ । दे॒वेषु॑ । अ॒नि॒शि॒त॒मि॒त्य॒नि-शि॒त॒म् । ओ॒जः॑ । तौ॒ । नः॒ ।
मु॒ञ्च॒त॒म् । आ॒ग॒सः॑ ॥ यत् । अ॒या॒त॒म् । व॒ह॒तु॒म् । सु॒र्या॒याः॑ ।
त्रि॒च॒क्रे॒णे॒ति॒ त्रि॒ – च॒क्रेण॑ । सꣳ स॒द॒मि॒ति॒ सम् – स॒द॒म् । इ॒च्छ॒मा॒नौ॑ ॥
स्तौ॒मि॒ । दे॒वौ । अ॒श्वि॒नौ॑ । ना॒थि॒तः॑ । जो॒ह॒वी॒मि॒ । तौ॒ । नः॒ ।

मुञ्च॑तम् । आ॒ग॒सः ॥ म॒रु॒ताम् । म॒न्वे । अ॒धी॒ति । नः । ब्रु॒व॒न्तु ।
प्रे॒ति । इ॒मा॒म् । वा॒चम् । वि॒श्वा॒म् । अ॒व॒न्तु । वि॒श्वे ॥ आ॒शून् । हु॒वे ।
सु॒य॒मा॒नि॒ति सु – य॒मा॒न् । ऊ॒तये॑ । ते । नः । मुञ्च॑न्तु । ए॒न॒सः ॥
ति॒ग्मम् । आ॒यु॒धम् । वी॒डि॒तम् । स॒ह॒स्वत् । दि॒व्यम् । श॒र्द्धः । 36 (50)

TS 4.7.15.5

पृ॒त॒ना॒सु जि॒ष्णु ।
स्तौ॑मि दे॒वान् म॒रु॒तो ना॒थि॒तो जो॑ह॒वीमि॒ ते नो॑ मुञ्च॑न्त्वे॒न॒सः ॥
दे॒वा॒नां म॒न्वे अ॒धि नो॑ ब्रु॒व॒न्तु प्रे॒मां वा॒चं वि॒श्वा॒म॒व॒न्तु वि॒श्वे ।
आ॒शून् हु॒वे सु॒य॒मा॒नू॒तये॑ ते नो॑ मुञ्च॑न्त्वे॒न॒सः ॥
यदि॑दं मा॒ऽभि॒शो॒चति॒ पौ॒रु॒षे॒येण॒ दै॒व्ये॒न ।
स्तौ॑मि वि॒श्वा॒न् दे॒वान् ना॒थि॒तो जो॑ह॒वीमि॒ ते नो॑ मुञ्च॑न्त्वे॒न॒सः ॥
अ॒नु नो॑ ऽद्या॒नु॒म॒ति-र॒न्वि – [] 37

TS 4.7.15.5 - Padam

पृ॒त॒ना॒सु । जि॒ष्णु ॥ स्तौ॑मि । दे॒वान् । म॒रु॒तः । ना॒थि॒तः । जो॑ह॒वीमि॒ ।
ते । नः । मुञ्च॑न्तु । ए॒न॒सः ॥ दे॒वा॒नाम् । म॒न्वे । अ॒धी॒ति । नः ।

पद पाठे (वाक्य सहित) – चतुर्थकाण्डे – सप्तमः प्रश्नः

ब्रु॒वन्तु॑ । प्रेति॑ । इ॒माम् । वाच॑म् । विश्वा॑म् । अ॒वन्तु॑ । विश्वे॑ ॥ आ॒शून् ।
हु॒वे । सु॒यमा॑निति॑ सु – यमा॑न् । ऊ॒तये॑ । ते । नः॑ । मु॒ञ्चन्तु॑ ।
ए॒नसः॑ ॥ यत् । इ॒दम् । मा । अ॒भि॒शो॒चती॑त्य॒भि-शो॑चति । पौ॒रु॒षेये॑ण ।
दै॒व्येन॑ ॥ स्तौमि॑ । विश्वा॑न् । दे॒वान् । ना॒थितः॑ । जो॒ह॒वीमि॑ । ते । नः॑ ।
मु॒ञ्चन्तु॑ । ए॒नसः॑ ॥ अ॒न्विति॑ । नः॑ । अ॒द्य ।
अ॒नु॒मति॑रियनु॑ – म॒तिः । अ॒न्विति॑ । 37 (50)

TS 4.7.15.6

द॒नु॒मते॑ त्वं वै॒श्वान॑रो न ऊ॒त्या पृ॒ष्ठो दि॒वि ॥
ये अ॒प्र॒थेता॑-म॒मि॒तेभि॑-रो॒जो॒भिर्ये॑ प्र॒ति॒ष्ठे अ॒भ॒वतां॑ वै॒सूनां॑ ।
स्तौमि॑ द्या॒वापृ॑थि॒वी ना॒थितो॑ जो॒ह॒वीमि॑ ते नो॑ मु॒ञ्च॒तम॑ ह॒सः ॥
उ॒र्वी रो॑द॒सी व॒रिवः॑ कृ॒णोतं॑ क्षे॒त्रस्य॑ प॒त्नी अ॒धि नो॑ ब्रू॒यातं॑ ।
स्तौमि॑ द्या॒वापृ॑थि॒वी ना॒थितो॑ जो॒ह॒वीमि॑ ते नो॑ मु॒ञ्च॒तम॑ ह॒सः ॥
यत् ते॑ व॒यं पु॒रु॒ष॒त्रा य॒वि॒ष्ठावि॒द्वाँस॑ श्र॒कृ॒मा क॒च्य॒ना – [] 38

TS 4.7.15.6 - Padam

इत् । अनु॒मत॒ इत्यनु॑ – म॒ते । त्वम् । वै॒श्वान॒रः । नः । ऊ॒त्या । पृ॒ष्टः ।
दि॒वि ॥ ये इति॑ । अप्र॑थेताम् । अमि॑तेभिः । ओजो॑भिरित्योजः – भिः ।
ये इति॑ । प्र॒ति॒ष्ठे इति॑ प्रति – स्थे । अभ॑वताम् । वसू॑नाम् ॥ स्तौमि॑ ।
द्यावा॑पृथि॒वी इति॑ द्यावा॑ – पृथि॒वी । नाथि॑तः । जोह॑वीमि । ते इति॑ ।
नः । मुञ्च॑तम् । अ॒ह॒सः ॥ उर्वी॑ इति॑ । रोद॑सी इति॑ । वरि॑वः ।
कृ॒णो॒तम् । क्षे॒त्रस्य॑ । प॒त्नी इति॑ । अधी॑ति । नः । ब्रू॒या॒तम् ॥ स्तौमि॑ ।
द्यावा॑पृथि॒वी इति॑ द्यावा॑ – पृथि॒वी । नाथि॑तः । जोह॑वीमि । ते इति॑ ।
नः । मुञ्च॑तम् । अ॒ह॒सः ॥ यत् । ते । व॒यम् । पु॒रुष॑त्रेति॑ पु॒रुष॑-त्रा ।
यवि॑ष्ठ । अवि॑द्वा॒सः । च॒कृ॒म । कत् । च॒न । 38 (50)

TS 4.7.15.7

ऽऽगः ।

कृ॒धी स्व॑स्मा॒ अदि॑तेर॒नागा॑ व्येना॒सि शि॑श्रथो वि॒ष्वग॑ग्ने ॥
यथा॑ ह॒ तद् व॑सवो गौर्यं॑ चि॒त् प॒दि षि॒ता म॑मुञ्च॒ता य॑जत्राः ।
ए॒वा त्वम॑स्मत् प्र॒ मुञ्चा॑ व्य॒हः प्रा॑तार्यग्ने प्र॒तरा॑न्न आयुः ॥ 39

TS 4.7.15.7 - Padam

आ॒गः ॥ कृ॒धि । स्वि॒ति । अ॒स्मान् । अ॒दि॒तेः । अ॒ना॒गाः । वी॒ति ।
ए॒ना॒सि । शि॒श्र॒थः । वि॒ष्वक् । अ॒ग्ने ॥ य॒था ॥ ह॒ । तत् । व॒स॒वः ।
गौ॒र्य॑म् । चि॒त् । प॒दि । सि॒ताम् । अ॒मुञ्च॑त । य॒ज॒त्राः ॥ ए॒वा । त्वम् ।
अ॒स्मत् । प्रे॒ति । मु॒ञ्च । वी॒ति । अ॒हः । प्रे॒ति । अ॒ता॒रि ।
अ॒ग्ने । प्र॒त॒रामि॑ति प्र – त॒राम् । नः । आ॒युः ॥ 39 (34)
(ग॒न्ता – दू॒ष॒य॒न्त् स्तौ॑मि – य॒योः – श॒र्द्धो – ऽनु॑म॒ति॒रनु॑ – च॒न –
च॒तु॒स्त्रि॒ंश॒च्च) (A15)

Special Korvai for Anuvaakam A-15

(अ॒ग्ने॒र्मन्वे॑ – यस्ये॒द॒ मिन्द्र॑स्य – यः॑ सं॒ ग्रा॒ममिन्द्र॑ – स नो॑
मुञ्च॑त्व॒ ह॒सः॑ ।

मन्वे॑ वा॒न्ता नो॑ मुञ्च॑तमा॒ग॒सः॑ ।

यो वां॑ – वा॒यो – रु॒प – र॒थी॑त॒मौ – यद॑या॒त॒ म॒श्चि॒नौ – तौ नो॑
मुञ्च॑तमा॒ग॒सः॑ ।

म॒रु॒ता॒न् – ति॒ग्मं – म॒रु॒तो – दे॒वा॒नां – य॒दि॒दं वि॒श्वा॒न् – ते नो॑
मुञ्च॑न्त्वे॒न॒सः॑ ।

अ॒नु न॑ – उ॒र्वी – द्या॒वा॒पृ॒थि॒वी – ते नो॑ मुञ्च॑त॒म॒ह॒सो॒ य॒तै॑ ।
च॒तु॒र॒ह॒सः॑ ष॒डा॒ग॒सश्च॑तु॒रे॒न॒सो॒ द्वि॒र॒ह॒सः॑ ।

Prasna Korvai with starting Padams of 1 to 15 Anuvaakams :-

अ॒ग्ना॒वि॒ष्णू – ज्यै॒ष्ठ्य॑ – श॒ञ्चो॒र् – क॒चा – ऽ॒श्मा॒ चा – ग्नि॒श्चा –
ऽ॒शु – श्रे॒द्ध॒म॒श्चा – ग्नि॒श्च घ॒र्मो – ग॒र्भा – श्रै॒का च॑ – वा॒जो नो॑
– अ॒ग्निं यु॑न॒ज्मि – म॒मा॒ग्ने – अ॒ग्ने॒र्मन्वे॑ – प॒ञ्च॑द॒श ।

पद पाठे (वाक्य सहित) – चतुर्थकाण्डे – सप्तमः प्रश्नः

Korvai with starting Padams of 1, 11, 21 Series of Panchaatīs :-

(अ॒ग्ना॒वि॒ष्णू – अ॒ग्नि॒श्च – वा॒जो॒ नो – अ॒द॒ब्धो॒ गो॒पा – न॒व॒त्रि॒ंश॒त्)

First and Last Padam of Seventh Prasnam of Kandam 4:-

(अ॒ग्ना॒वि॒ष्णू – प्र॒त॒रान्न॒ आयुः)

Kaanda Korvai with starting Padams of 7 Prasanas of Kandam 4:-

(यु॒ञ्जा॒नो – वि॒ष्णो – र॒पा – र॒श्मि॒र् – न॒मो – ऽश्म॒ –
न॒ग्ना॒वि॒ष्णू – स॒प्त)

॥ हरिः ओं ॥

॥ कृष्ण यजुर्वेदीय तैत्तिरीय संहितायां चतुर्थकाण्डे

पद पाठे सप्तमः प्रश्नः समाप्तः ॥

॥ इति चतुर्थ काण्डं ॥

पद पाठे (वाक्य सहित) – चतुर्थकाण्डे – सप्तमः प्रश्नः

Summary breakup of Padam - in Kaandam 4, Prasnam 7

Particulars		Example (in Pada PaaTam)	No. of Padams as per Pada PaaTam
सामान्य पदानि	Ord	इषे । त्वा । ऊर्जे ।	1730
उपसर्ग पदानि	PRE	एति = (आ+इति) । उपेति = (उप+इति) । प्रेति = (प्र+इति) ।	51
वेष्टन पदानि	PS	उपायवः = उपायव इत्युप - आयवः । बाहुभ्याम् = बाहुभ्यामिति बाहु - भ्याम्) ।	206
प्रग्रह पदानि	PG	ते = (ते इति) । त्वे = (त्वे इति) । चक्षुषी = (चक्षुषी इति) । विष्णो = विष्णो इति ।	9
प्रग्रह वेष्टन पदानि	PGS	अधिषवणे = अधिषवणे इत्यधि - सवने । इन्द्राग्री = इन्द्राग्री इतीन्द्र - अग्री	12
Total Padams			2008

पद पाठे (वाक्य सहित) – चतुर्थकाण्डे – सप्तमः प्रश्नः

Details of Panchati and Padam for Kandam 4, Prasanam 7 (TS 4.7)

	Panchati	Padams
Anuvakam 1	2	118
Anuvakam 2	2	114
Anuvakam 3	2	108
Anuvakam 4	2	114
Anuvakam 5	2	98
Anuvakam 6	2	121
Anuvakam 7	2	84
Anuvakam 8	1	66
Anuvakam 9	1	68
Anuvakam 10	2	90
Anuvakam 11	2	111
Anuvakam 12	3	152
Anuvakam 13	5	237
Anuvakam 14	4	193
Anuvakam 15	7	334
Total →	39	2008

Notes:

1. Please refer to the book “TS Kandam 1” and “TS 1.1 pada paadam with Vaakyam” for notes and conventions used in this Compilation.
2. Please download our vedic compilations from our web site www.vedavms.in